

Il rumantsch renascha en la scola da Domat

Il moviment rumantsch è s'engaschè per ina buna soluziun

■ **(Ir) Suenters ch'il rumantsch ha già difficultads da subsister a la scola populara da Domat è sa midada la situaziun sin l'entschatta dal nov onn da scola. Ina stretga collavuraziun da plirs partenaris ha manà a la nova soluziun.** Domat n'ha mai già il rumantsch sco lingua uffiziala u da scola, er sche la vischnanca vegn tenor lescha da linguas dal chantun Grischun attribuida al territori rumantsch. Las emprimas duas classes da la scola primara avevan lecziuns da rumantsch obligatorias. Plinavant è vegni purschì il rumantsch, parallel al talian, sco rom da tscherna a partir da la terza classa primara.

Situaziun nunccontentaivla

Ursin Fetz, che viva a Domat, ha constatà las difficultads da l'instrucziun da rumantsch da fin alura tar ses agens uffants: «Las annunzias gievan adina enavos. Pliras annadas han stuì vegnir messas ensemen. I ha adina puspè da midadas tar la magistraglia.» Insumma, ina situaziun che na contentava nagin. En plirs discurs cun auters geniturs da lingua rumantscha han ins empruvà da persvader da chattar in'otra soluziun. L'Acziun romontscha da Domat ha contactà la Lia Rumantscha (LR). Sin recumandaziun e cun sustegn da la LR èn vegnidas organisadas sairadas d'infurmaziun. Ils specialists en materia, *Werner Carigiet* e *Rico Cathomas*, han pudì persvader ils geniturs che la bilinguitad è impurtanta e ch'il rumantsch è ina gronda schanza per lur uffants.

Gruppa da lavur bain francada en la populaziun

Las autoritads politicas da Domat che



Urs Cadruvi (dretg) surdat al manader da scola Jürg Carisch simbolicamain il stgazi da la lingua rumantscha.

MAD

avevan renconuschì la bilinguitad da lur vischnanca han dà l'incumbensa a l'autorità da scola dad elavurar in concept per estructurar da nov l'instrucziun rumantscha. La vischnanca burgaisa da Domat ha surpiglià ina part dal credit per quest concept. Il president da quella, *Theo Haas*, explitgescha la raschun: «Nus dain adina puspè contribuziuns per ovras socialas, sportivas e culturalas. Il rumantsch ans stat a cor e perquai avain nus sustegni finanzialmain l'elavuraziun dal nov concept per la scola.» Il cussegl da scola laschè examinar las variantas che vegnivan en dumonda. Per quest scopo ha el stgaffi ina gruppa da project ed ina gruppa da resonanza. La gruppa da project è vegnida manada

dal manader da scola, *Jürg Carisch*, e dal cusseglader extern, *Bernhard Wenger*. A la gruppa da resonanza han fatg part represchentants da differents gremis, tranter auters la suprastanta dal departament da scola, *Gabriela Aschwanden*, scolasts e represchentants dals geniturs e da la LR. Tant la lescha communal da Domat sco la lescha chantunala da linguas prevesan ch'igl è pussaivel da stgaffir classas bilinguas. L'instrucziun bilingua è ina purschida attractiva d'emprender e betg be ina mesira da protecziun per linguas minoritaras. Tenor ina retschertga cun questunari renconuschian ils geniturs ils avantatgs da questa purschida. Las experientschas dals commembers da la gruppa da reso-

nanza han manà ad in model spezial, adattà als basegns da la scola da Domat.

La varianta preferida

Da las variantas che vegnivan en dumonda è vegnida tschernida la sequenta: En ina chasa da scola a Domat vegnan, durant la scola primara, manadas 3 classas bilinguas cumbinadas. Duas annadas vegnan instruidas ensemen. L'introducziun capita da maniera successiva, quai vul dir che mintg'onn vegn latiers la 1. classa. Sche l'interess davart da la populaziun rumantscha n'avev betg dad esser sufficient, pon vegnir messas ensemen trais annadas. Plinavant datti anc la pussaivladad ch'ils uffants rumantschs furman in'atgna partiziun e ch'il rest frequentia ina classa tudestga.

Gronda surpraisa tar las annunzias

«Suenters l'occurrència d'infurmaziun dal schaner da quest onn vevan nus da la direcziun da scola pensà che almain ses uffants frequentian la classa immersiva», di *Markus Schwarz*, il responsabel per la scola primara. Lur giavisch era in dumber da nov uffants. Ina dumonda impurtanta era quella dal transport dals uffants, cunquai che be ina scola da Domat porscha questa instrucziun. Markus Schwarz exprima sia satisfacziun: «Nus avain survegnì 13 annunzias ed uschia pudain nus manar ina classa cumpletta. Quai che fa grond plaschair a nus è che nus vain anc duas scolinas immersivas cun annadas da 20 respectiv 16 uffants.» Da remartgar è anc che quels 13 uffants da la classa immersiva fan part d'in total da 82 sco-

lars, damai in sisavel frequenta la scola bilingua.

Ina tur da signal

La scolasta rumantscha da la classa immersiva, *Petra Uffer*, explitgescha la constellaziun da la classa: «Areguard il rumantsch è la gruppa fitg eterogena. La gronda part dals uffants discurra er a chasa rumantsch, ma quatter na san insumma nagin rumantsch.» Petra Uffer di che l'entschatta saja stada buna. Ils uffants rumantschs discurrian cun ella savens rumantsch e ch'ils auters hajan en il fratep emprendì ad enconuscher ina part dal material en rumantsch sco era las cifras enfin 24. Las scolastas discurrin rumantsch da matematica (5), da lingua/uman ed ambient (3), da chant (2) e da gimnastica (1). Ils uffants cun lingua materna rumantscha discurrin rumantsch da Domat, sursilvan e jauer. A regard ils meds d'instrucziun ha ditg Ursin Fetz: «Per nus era cler che cunquai ch'ils Rumantschs da nossa vischnanca vegnan da tut las valladas na dettia nagina altra opziun che prender ils meds en rumantsch grischun.» Per el è la classa immersiva sco ina tur da signal per l'avegnir dal rumantsch a Domat. Tut ils pertutgads èn da l'avis che la collavuraziun tranter plirs partenaris haja funcziunà fitg bain. Plinavant constateschan ils responsabels da Domat ch'il moviment rumantsch, cun l'Acziun romontscha da Domat e la LR, haja prestà gronda lavur d'infurmaziun e persvasiun che haja finalmain pussibilità questa buna soluziun per la scola da Domat.